



Inatsisunut Ataatsimiititaliaq
Maani

Uunga siunnersuut: Nioqqutissanik eqqussuineq annissuinerlu pillugit Inatsisartut inatsisaata allanngortinneqarneranik Inatsisartut inatsisaattut siunnersuut (UPA 2015/85), kiisalu Naalakkersuisut tassunga allannguutissatut siunnersuutaat pillugit siunersieqatigiinnermut aggeqqusissut.

Dato: 5. maj 2015

Sagsnr.: 2014-098921

Inatsisinut Ataatsimiititaliap Aningaasaqarnermut Aatsitassanullu Naalakkersuisoq, **tallimanngornermi 8. maj, nal. 14.00-imiit 15.00-imut**, Inatsisartut ataatsimiittarfianni 1-imi siunersieqatigiinnermut aggersarpaa.

Postboks 1605

3900 Nuuk

Tlf. (+299) 34 50 00

Fax (+299) 32 20 42

E-mail: tax@nanoq.gl

www.nanoq.gl

Inatsisinut Ataatsimiititaliaq UPA2015/85-ip suliarineqarneranut atatillugu 26. marts aamma 14. april Naalakkersuisunut arlalinnik apeqquteqarpoq. Ataatsimiititaliaq 1. april aamma 17. april akissuteqarfigneqarpoq. Inatsisinut Ataatsimiititaliap tamatuma nanginneratut Aningaasaqarnermut Aatsitassanullu Naalakkersuisoq malitsitut apeqqutinut arlalinnut akissuteqarfiusumik siunersieqatigiinnermut aggersarpaa:

Apeqqutit makku akissuteqarfigneqquneqarput/itisileqquneqarput:

1. Siunnersuutip aappassaaneerutaasumik suliarineqarnissaanut allannguutissatut siunnersuummik, inatsisissatut siunnersuummut immikkoortumik allamik nutaamik ilanngussillutik Naalakkersuisut saqqummiussipput.

Allannguutissatut siunnersuutip nassatarissavaa, ininik pisatsersuutinillu akileraaruseriffiup usinik usingiarneqartunik usilersorneqartunilluunniit, taamatullu ilaasunik niusunik ikiartortunillu misissuiffissaanik umiarsualiviit timmisartoqarfiillu atugassiinissaannik akileraaruseriffiup piumasaqaateqarsinnaanera, tamanna akileraaruseriffimmut aningaasartuutaanngitsumik. Pisatsersuutinut piumasaqaatit misissuinerup ingerlanneqarsinnaaneranut pisariaqartuussapput. Assersuutigalugu ilaasunik nassiusanillu misissuinnermut inimik pisariaqartinneqartunik atortulersukkamik atugassiisoqarnissaanik tamanna pisariaqarpat inassuteqaateqartoqarsinnaavoq imaluunniit usingiaaffinni usilersorfinnilu sumiiffinnik assersukkanik atugassiisoqarnissaanik.

Talittarfiit mittarfiillu piumasaqaatinik taaneqartunik naammassinnissinnaanngippata, nioqqutissanik usingiaaneq usilersornerlu taamatuttaaq ilaasussanik ikisoqarsinnaanera ilaasunillu niusoqarsinnaanera akileraaruseriffiup inerteqqutigisinnaavaa.

Allannguutissatut siunnersuutip inuussutissarsiuutinik ingerlatsisunut pisortanullu aningaasaqarnikkut allaffissornikkullu kingunerisassai pillugit nassuiaateqaqqullugit Naalakkersuisut Inatsisinut Ataatsimiititaliamit qinnuigineqarnikuupput.

Umiarsualiviit ininik taamaallaat misissuinermit ataavartumik atugassanik atugassiinissaat siunnersuutip tunngaviatigut siunertaringikkaa Naalakkersuisut akissuteqaamminni oqaatigaat. Siunertaasorli tassaavoq akileraaruseriffiup piffissani misissuinissamik pisariaqartitsiffiusuni ininik, sumiiffimmut usit ilaasulluunniit nunamut niuneqarfiannut qanittumiittumik atugassinneqarnissaa. Init piffissani allani siunertanut allanut umiarsualiviup aalajangersagaanut nalinginnaasumik atorneqarsinnaassapput.

Taamaammallu misissuisarnissaq siunertaralugu ininik atugassiinermit aningaasartuutaasussat ikittuinnaassussat Naalakkersuisunit nalilerneqartoq.

Usilersorfiusuni usingiaaffiusunilu ungalulersornernut / assiaqusersuinernut aningaasartuutaasussat Naalakkersuisut naliliinerat malillugu aamma ikittuinnaassappat?

Akissut:

Ungalulersornernut assiaqtersuinernullu aningaasartuutaasussat ikittuinnaanissaat Naalakkersuisut nalilerpaat.

Oqaatigineqassaaq umiarsualiveqarfiit ulloq unnuarlu naallugu sulisoqarluni ungalulersugaareerlutillu assiaqtersugaareertarmata, ilaatigut susassaqaangitsut sumiiffinnut aalajangersimasunut appakaatinnginnissaat qulakkeerniarlugu, ilaatigullu isumannaallisaaneq pissutigalugu. Akileraaruseriffiup misissuisarnissamini assiaqtersuutaareersunik atuisarnissaa tunngaviatigut siunniussaavoq.

2. Sulisitsisut (Grønlands Erhverv) tusarniaanermut akissuteqaamminni § 32 a, imm. 1-imi oqaasertaliinerup allannortinneqarnissaa kaammattuutigaat. Aalajangersakkap oqaasertalerneqarnera naapertorlugu Akileraaruseriffik umiarsualiviit timmisartoqarfiillu "sananeqarneranni pisatsersorneqarnerannilu" immikkut ittunik piomasaaqateqarsinnaatitaavoq. Sulisitsisut (Grønlands Erhverv) isumaqarput akileraaruseriffik umiarsualivinni timmisartoqarfinnilu ininut akileraaruseriffimmit misissuinermit atorneqartussanut taamaallaat piomasaaqateqarsinnaasoq aalajangersakkap oqaasertalerneqarnerani ersittariaqartoq.

§ 32 a, imm. 1-imut tunngatillugu Naalakkersuisut kaammattuut malissimangikkaat Inatsisinut Ataatsimiititaliap paasivaa, taamaattorli inatsimmut nassuiaatini ima allassimasoqartoq:

Piomasaaqaatit ininut pisatsersuinernullu misissuinissap isumagineqarnissaanut pisariaqartunut tunngasuupput, misissuinissallu siunertaanik naammassinninnissamut piomasaaqaataasunit annertunerusinnaanatik. Tassunga atatillugu erseqqissarneqarpoq init akileraaruseriffiup pitsaasumik misissuinissaanut atugassat nassiussanik ilaasunilluunniit nunamut niusiffiusup angallammulluunniit ikisiffiusup eqqaaniinnissaat qanittunnguaniinnissaalluunniit akileraaruseriffiup taamaallaat peqqusutigisinnaammagu. Akileraaruseriffik umiarsualivinni timmisartoqarfinniluunniit ingerlatat illuutilluunniit qanoq sanaartorneqarnissaannut pisatsersorneqarnissaannulluunniit aalajangiisuunngilaq.

§ 32 a, imm. 1-3 ima allassimavoq:

§ 32 a. Akileraaruseriffik imminut aningaasartuutaanngitsumik, umiarsualiviit timmisartoqarfillu nioqqutissanik usingiaaffiusartussat usilersuiffiusartussalluunniit, imaluunniit ilaasunik nunamut niusiffiusartussat ilaasussanilluunniit ikisiffiusartussat sananeqarneranni pisatsersorneqarnerannilu immikkut ittunik piumasaqaateqarsinnaatitaavoq.

Imm. 2. Nunani allani sumiiffiit sumiiffiillu Kalaallit Nunaanni akitsuuteqarfiusumiittut akornanni ilaasunik angallassisarnissanik pilersitsisoqartillugu ininik pisariaqartunik atortulersugaasunik pisatsersugaasunillu, ilaasut il.il. misissorneqarnissaanni atugassiisoqarnissaa akileraaruseriffiup imminut aningaasartuutaanngitsumik peqqussutigisinnaavaa.

Imm. 3. Sumiiffinni nioqqutissanik usilersuiffiusartuni usingiaaffiusartuniluunniit, imaluunniit ilaasunik nunamut niusiffiusartuni ilaasussanilluunniit ikisiffiusartuni akileraaruseriffik akuersiseqqaarnagu aqqutigineqarsinnaanngitsunik assersuisoqarnissaa akileraaruseriffiup imminut aningaasartuutaanngitsumik peqqussutigisinnaavaa.

Imm. 2-mi imaluunniit imm. 3-mi piumasaqaatigineqanngitsunik piumasaqaateqarnissamut imm. 1 tunngavissiiva? Allatut oqaatigalugu misissuinerup ingerlanneqarsinnaaneranut pisatsersuutitut pisariaqartinneqartunut piumasaqaatit, assersuutigalugu ilaasunik nassiusanillu misissuinermut ininik pisariaqartinneqartunik atortulersukkamik atugassiisoqarnissaanik usingiaaffinnilu usilersorfinnilu sumiiffinnik assersukkanik atugassiisoqarnissaanik piumasaqaatit saniatigut akileraartarnermut aqutsisoqarfik allanik umiarsualivinnit timmisartoqarfinnillu piumasaqaateqarsinnaava?

Akissut:

Akileraaruseriffiup imminut aningaasartuutaanngitsumik, umiarsualiviit timmisartoqarfillu nioqqutissanik usingiaaffiusartussat usilersuiffiusartussalluunniit, imaluunniit ilaasunik nunamut niusiffiusartussat ilaasussanilluunniit ikisiffiusartussat ininik, nioqqutissat usingiarneqartut usilersuunneqartussalluunniit, immaqalu aamma assartuutit nioqqutissanik taakkuninnga nassarsimasut nassartussalluunniit misissorneqarnissaannut naleqquttunik atugassiinissaannik piumasaqaateqarsinnaanera § 32 a, imm. 1-imi tunngavissinneqarpoq. Akileraaruseriffiup imm. 1 tunngavigalugu, assersuutigalugu piumasaqaatigisinnaavaa timmisartumut ilaasut nunanut allanukalersut nunanilluunniit allanit tikittut, nioqqutissanik akitsuuteqanngitsunik pisereerneramik kingorna – imaluunniit nunanit allanit tikittut akitsuuserinermik nakkutilliisunik aqqusaarereertinnatik nunap iluani angalasunit immikkoortinneqarnissaat.

Tassa imaappoq imm. 1-imi aalajangersakkap atuuffia imm. 2-p 3-llu atuuffiinit annertuneruvoq.

3. Sulisitsisut (Grønlands Erhverv) tusarniaanermut akissuteqaamminni maluginiarpaat siunnersuut malillugu ininik pisatsersuinissamut akileraaruseriffiup piumasaqaataata naammassineqarnissaanut tunngatillugu aningaasartuutit talittarfimmit timmisartoqarfimmillu pineqartumit isumagineqartussaasut. Sulisitsisut (Grønlands

Erhverv) isumaqarput aningaasartuutit pisortanit isumagineqartariaqartut. Tassunga atatillugu aamma umiarsualiviit timmisartoqarfiillu ataasiakkaat ataqatigiissaagaanikkut issigiinngitsuusut, taamaammallu aaqqissuussinissamut akileraaruseriffiup piumasaqaataanik naammassinninniarneq taakkununga assigiinngisitaarsinnaasoq Sulisitsisunit tikkuarneqarpoq.

Kaammattuut Naalackersuisunit malinneqarsimanngitsoq Inatsisinut Ataatsimiittaliap paasivaa. Aamma misissuisarnissaq siunertaralugu inimik atugassiinermut aningaasartuutaasussat ikittuinnaasussat Naalackersuisunit nalilerneqartut Inatsisinut Ataatsimiittaliap paasivaa.

Sulisitsisunit kaammattuummut tassunga Naalackersuisut qanoq oqaasissaqarpat? Akileraartarnermut aqutsisoqarfiup misissuinernik ingerlatsisinnaalernissaanut atatillugu aningaasartuutit akileraartarnermut aqutsisoqarfimmit namminermit isumagineqassappata naapertuuttuliornerussangila?

Akissut:

Umiarsualiviit timmisartoqarfiillu ininik misissuinerinnavimmut atugassanik atugassinissaat siunnersuutikkut siunniussaangilaq. Siunniussaasoq tassaavoq akileraaruseriffiup piffissani misissuinissamik pisariaqarsorinniffiini inimik, nassiussat ilaasulluunniit nunamut niuneqarfiisa qanittuaniittumik atugassiisoqarnissaa. Init piffissani allani siunertanut allanut umiarsualiviup aalajangersagaanut nalinginnaasumik atorneqarsinnaassapput.

Taamaattumik nalilerneqarpoq misissuisarnissaq siunertaralugu inimik atugassiinermut aningaasartuutaasussat ikittuinnaassasut.

Naalackersuisut naliliipput tassunga aningaasartuutaajunnartut tassaassasut assartuisut/atuisut akilertariaqagaat, imaanngitsoq akileraartartut tamavimmik. Aamma oqaatigineqassaaq akileraaruseriffik aningaasartuutaajunnartunik akiliisussaatinneqassappat, tamanna aningaasartuutissat matussuserumallugit aningaasanut inatsimmi immikkut aningaasaliiffigisassanngorlugu sulissutigineqartariaqassasoq, taamaattoqarnissaalu sanaartorneqartussanut akitsorsaataasinnaavoq kinguarsaataasinnaallunuunniit.

4. Allanguutissat siunnersuut umiarsualivinni mittarfinnilu atuisunit tamakkiisumik akiliisitsisoqartalernissaanik tunngaveqartoq Ineqarnermut, Sanaartornermut Attaveqarnermullu Naalackersuisoqarfiup tusarniaanermut akissuteqaammini tikkuarpaa, tamannalu Naalackersuisoqarfimmit pivusorsiortuusorineqanngilaq. Naalackersuisoqarfik taamaammat naliliivoq umiarsualivinni timmisartoqarfinnilu akileraaruseriffiup piumasaqaataanut naapertuuttumik aaqqissuussinissat Nunatta Karsianit matussuseritariaqarnissaat ilimanartorujussusoq.

Naalackersuisut tamatumunnga qanoq oqaaseqaatissaqarpat?

Akissut:

Apeqqut 3-mut akissut innersuussutigineqarpoq.

5. Malittarisassat atuuttut (nioqqutissanik eqqussuineq annissuinerlu pillugit Inatsisartut inatsisaanni § 30, imm. 4) inuit Kalaallit Nunaannut/nnit angalasut 15.000 euronik amerlanerusunilluunniit nassataqartut tamanna pillugu akileraaruseriffimmut paasisutissiinissaannut pisussaaffilerpai.

Inatsisissatut siunnersuutikkut inuit suliffeqarfiillu il.il., aningaasanik tigorianaannarnik 15.000 euronik amerlanerusunilluunniit naleqartunik Kalaallit Nunaanniit nassiussisut, nassiussanilluunniit taamaattunik nunamit Kalaallit Nunaata avataaneersumit tigusaqartut taamatulli Akileraaruseriffimmut tamatumingga nalunaaruteqartussaannerat atuutilersinneqassaaq.

15.000 euro ullutsinni 110.000 kr-it missaannik naleqarput. Aningaasat amerlassusissaannut killiliussanik assinginik aningaasanik peqquserlulluni "malunnarunnaarsaanermut" inatsimmi aalajangersagaqarpoq.

Pinerluuteqarluni aningaasarsianik (assersuutigalugu hashimik tuniniaanermi) pinerluuteqarnermiluunniit atugassanik (assersuutigalugu hashimik pisinissamut) nuussisinnaanerup pinaveersimatinnissaa malittarisassani atuuttuni § 30, imm. 4-mik siunnersuutigineqartumilu § 30, imm. 5-imik siunertaavoq. Aningaasat tigorianaanaat 100.000 kr-init amerlanerusut, inuit angalasut nalinginnaasumik nassatarisinnaasaannit amerlanerungaatsiartutut isummerfigineqarsinnaaput, aningaaserivillu saniatigut aningaasanik taamak amerlatigisunik nassiussatut nassitsisinnaasut amerlavallaarunangillat.

Tamanna tunngavigalugu Inatsisinut Ataatsimiititaliap Naalakkersuisut aperinikuuai, aningaasanut nassatarisinnaasanut 15.000 euronut killiliineq sumik tunngaveqarnerseq, taassuminngalu appasinnerusumut killiliineq pinerlutsaaliuinermut iluaqutaanerussannginnerseq.

Aningaasanut killiliussa 15.000 euro aningaasanut tigorianaannut, inunnit Kalaallit Nunaannut tikittunit tassanngaanniillu aallartunit nassarneqarsinnaasanut killiliussaasoq 15.000 euro naapertorlugu aalajangersagaasoq Naalakkersuisut akissutiminni oqaatigaat.

Killiliussamik appaanerup pinerlutsaaliuinissamut iluaqutaasinnaanissaa Naalakkersuisut assortorsinnaanngilaat. Ilanngaaserinermulli oqartussaasut aningaasanik tigorianaannarnik nassatanik misililluni misissuisinnaanerit aalajangersakkami periarfissinneqarpoq. Pinerluttulerinermik inatsimmik unioqqutit-sisoqarneranik pasitsaassisoqarnerani suliassa 8.000 euronut paasiniaaffigisassanngorlugu politiiqut ingerlateqqinneqassaaq, aningaasat amerlassusiat apeqqutaatinnagu.

Inatsisinut Ataatsimiititaliap allannguutissatut siunnersuummik saq-qummiussissagaluarpat, taamaalillunilu atuuttumi § 30, imm. 4-mi inatsisissatullu siunnersuutigineqartumi § 30, imm. 5-mi aningaasat amerlanerpaaffissaannut killiliussa 8.000 euronut imaluunniit 10.000 euronut appartinneqarluni, Naalakkersuisut tamatumunnga qanoq isummissagaluarpat?

Akissut:

Nakkutilliinermut tunngatillugu aningaasanut killiliussanik assigiinngitsunik, aningaasat timmisartukkut nassiunneqarnerat imaluunniit Kalaallit Nunaannut tikinnermi – tassanngaanniilluunniit aallarnermi nassatarineqarnerat apeqqutaatillugu atuinissaq Naalakkersuisut naleqquttuusorinngilaat.

Aamma Iluanaarutininik peqquserlunnikkut pissarsianik toqqorterisoqarnissaanik aammalu pinerliiniarnernut aningaasalersuinissamik pinaveersaartitsinissaq pillugu inatsisip Kalaallit Nunaannut atortuulersinneqarnera pillugu peqqussummi § 14, imm. 1-imi aningaasanut killiliussaq 100.000 kr.-iusoq atuuppoq, taannalu aningaasanut 15.000 euronut killiliussassatut siunnersuutaasumut naapertuuttuovoq, aammattaarlu Iluanaarutininik peqquserlunnikkut pissarsianik toqqorterisoqarnissaanik aammalu pinerliiniarnernut aningaasalersuinissamik pinaveersaartitsinissaq pillugu danskit inatsisaanni atuuttumi (LBK nr. 1022, 13/08/2013-imeersumi) aningaasanut killiliussamut 15.000 euronut taamatulli naapertuuppoq.

Aningaasanut killiliussap maanna siunnersuutaasumit appasinnerutinnissaa pitsaanerussanersoq Naalakkersuisut uppernarsaatissaqartinngilaat, kisitsisilli appasinnerusunngorlugu allanngortinneqarnissaa Ataatsimiititaliap kissaa-tigissappagu kisitsisit ataqatigiissaagaasumik allanngortinneqarnissaat Naalakkersuisut sulissutigissavaat.

6. Naalakkersuisut meeqqat 15-it inorlugit ukiullit scannerut atorlugu misissorneqarsinnaannginnissaannut malittarisassanik aalajangersaanissartik siunertarigaat Naalakkersuisut paasissutissiissutigaa.

Malittarisassap taamaattup atuutsilersinneqarnera, ikiaroorntumik eqqussuisut siunissami siunertarinqartumut uniuissisumik meeqqanik ikioroorntunik eqqussuisut atuinissamut ussarnartorsiulersinnaanerannik nassataqarsinnaanera pillugu Inatsisinut Ataatsimiititaliap Naalakkersuisut aperinikuuai.

Naalakkersuisut akissutaanni erserpoq, ukiutigut killiliussassatut eqqarsaatigineqartup kingunerisaanik meeqqat ikiaroorntunik eqqussuinermi atornerqarsinnaanerat Naalakkersuisut ilimagingikkaat. Pasinninnissamut tunngavissaqartillugu meeqqat maannakkutut pisarnejq malillugu misissorneqartassapput.

Inatsisinut Ataatsimiititaliap akissut ima paasivaa, tassa meeraq nassartillugu eqqusseriarnermi paasiteratarsinnaanerup inersimasoq nassartillugu eqqusseriarnermi paasiteqatarsinnaaneq assigiinnapajaaraa Naalakkersuisunit nalileneqartoq.

Ilaasut inersimasut pasinninnissamut tunngavissaqarmat misissugassanngorlugit toqqarneqartut kisimik – aatsaallu scannerneqarnissaminut akuersippata - scannerneqartassapput. Pineqartut scannerneqarnissamut akuersinngippata taava taakku "qangatut" misissorneqartassapput: Timimikkut misissorneqartassapput timillu sulluinut toqqorsillutik eqqusseriartutut pasitsaanneqarpata politiiunut tunniunneqassallutik, napparsimmavimmi scannertinneqarnissaat imaluunniit perusersartarfiliaanneqarnissaat siunertaralugu.

Meeraq 15-it inorlugit ukiulik misissugassatut toqqarneqarpat (soorlu inersimasunut pasissallugit tunngavissaqartunut taamaattoq) taanna scannerneqarnissamut akuersinissaminut periarfissaqanngilaq, taarsiulluguli "qangatut" misissorneqassaaq, soorlu tamanna inersimasunut scannerneqarnissamut itigartitsisunut atuuttoq.

Inersimasut tamarmik scannerneqartartussanngorlugit aaqqissuussamik eqqussigaanni, meeqqallu qanorluunniit misissorneqarsinnaatinnagit, taava ikiaroorntumik eqquussisut ikiaroorntumik eqquusserminni meeqqanik atuilersinnaanerit soorunami aarleqqutigineqarsinnaanerulissaaq.

Meeqqalliuku misissorneqartussaajunnaangitsut – misissuineruna allatut iliorluni ingerlanneqartussaaginnartoq, tassa ilaasunut tamanut misissueriaaseq ullumikkut atornerartoq assigalugu. Inersimasut tamarmik aamma scannerneqassanngillat. Taamaallaat inersimasut pasissallugit tunngavissaqartut scannerneqassapput, aatsaallu taakku scannerneqarnissaminut akuersippata.

Paasinninneq taanna eqqortuua, meeqqallu ikiaroorntumik eqquussermini atorneratararsinnaanerannut tunngatillugu Naalakkersuisut arlaannik ilanngussasaqarpat?

Akissut:

Tamanna eqqorpoq.

Meeqqanik inuusuttunillu misissuisarnek eqqarsaatigalugu Akileraaruseriffik mianersortorujussuusarpoq. Akileraaruseriffiup qimmii tunngavissalimmik pasinartoqarneranik takussutissiinngippata imaluunniit meeqqap/inuusuttup angajoqqaani/inersimasut angalaqatigisai tunngavissalimmik pasineqanngippata, taava meeqqat inuusuttullu (assersuutigalugu ataasiakkaanik misissuinerut) misissorneqarnek ajorput.

Akileraaruseriffik tassunga atatillugu nalunaarpoq, meeqqat 18-it inorlugit ukiullit ikiaroorntunik anngiortumik eqquusserni eqquusseriaraluarnerniluunniit akuusimanerat pillugu sulianik ilisimasaqarani.

7. Naalakkersuisut naliliipput ukiutigut killiliussaq, taamaaliornissaq peqqinnissaq eqqarsaatigalugu inassutiginaangikkaluarpalluunniit, eqqartuunneqarsinnaasut ukiuannut killiliussamit appasinnerutinneqartariaqanngitsoq.

Tamanna sumik tunngavilerneqarpa?

Akissut:

Naalakkersuisut naliliipput ukiutigut killiliussaq eqqartuunneqarsinnaasut ukiuannit appasinnerutinneqartariaqanngitsoq – meeqqammi inuusuttullu 15-it inorlugit ukiullit timikkut scannerneqarnerup sunik kinguneqarsinnaanera paasiuminaatsissinnaavaat.

Ataatsimiititaliarli tassunga tunngatillugu kissaateqassagaluarpat Naalakkersuisut tusaaniarumaarput.